

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 260129 25 St
Zenica, 13.07.2026. godine

Općinski sud u Zenici, stečajni sudija Amela Sinanović, u stečajnom postupku nad stečajnim dužnikom Društvo za proizvodnju, trgovinu i usluge ZISA-TEX d.o.o. Zavidovići, ul. Zlatnih ljiljana bb, Zavidovići, nakon ročišta održanog dana 09.04.2026. godine u prisustvu privremenog stečajnog upravnika Saletović Amerise iz Zavidovića, van ročišta, dana 13.07.2026. godine, donio je sljedeće:

R J E Š E N J E

Otvara se i zaključuje stečajni postupak nad stečajnim dužnikom Društvo za proizvodnju, trgovinu i usluge ZISA-TEX d.o.o. Zavidovići, ul. Zlatnih ljiljana bb, Zavidovići, MBS: 43-01-0477-19, JIB: 4219054450008, zbog nepostojanja imovine dovoljne za pokriće troškova stečajnog postupka, te se nalaže brisanje ovog privrednog društva iz sudskog registra zavedenog pod matični registarski broj 43-01-0477-19, po pravomoćnosti ovoga rješenja.

O b r a z l o ž e n j e

Stečajni dužnik je kao predlagatelj dana 30.04.2025. godine podnio prijedlog za otvaranje stečajnog postupka.

Rješenjem ovog suda broj 43 0 St 260129 25 St od 12.09.2025.godine, pokrenut je prethodni postupak radi utvrđivanja uslova za otvaranje stečajnog postupka nad imovinom pravnog lica označenog u izreci ovog rješenja, a za privremenog stečajnog upravnika je imenovana je Amerisa Saletović iz Zavidovića, sa liste stečajnih upravnika.

Da bi utvrdio stečajne razloge iz čl. 6. Zakona o stečaju (Sl. novine F BiH, broj: 53/21), sud je zakazao ročište za utvrđivanje uvjeta za otvaranje stečajnog postupka.

Ročište za utvrđivanje uvjeta za otvaranje stečajnog postupka održano je dana 09.04.2026.godine u prisustvu privremenog stečajnog upravnika Amerise Saletović, a u odsutnosti uredno obaviještenog predlagatelja.

Na ročištu za utvrđivanje uslova za otvaranje stečajnog postupka, privremena stečajna uprava izlažući svoj Izvještaj o radu, zaprimljen kod ovog suda dana 17.10.2025.godine, je izjavila da vrši ispravku istog u tački 1. Mišljenja gdje treba da stoji da društvo nema imovinu. Za vrijeme izrade izvještaja imala je kontakte sa direktorom Hutinović Zikretom, sa računovođom koji vodi poslovne knjige Okanović Emirom, vl. SD "DATA" i Sabahetom Starčević. Prema njihovim izjavama društvo se bavilo tekstilnom industrijom, a sva oprema i mašine nisu bile u vlasništvu privrednog društva, već su bile iznajmljene. Društvo je poslovalo do pandemije COVID-19 virusom, a uslijed nastupanja pandemije i otežanog poslovanja na tržištu društvo je izgubilo

poslove i od tada ne obavlja svoju registrovanu djelatnost. Dokumentacije se nalazi na adresi kod Starčević Sabahete, koja je rukovodila poslovanjem. Uvidom u finansijsko poslovanje stečajnog dužnika i poslovnu dokumentaciju utvrdila je da su poslovne knjige vođene uredno, dok je privredno društvo radilo. Godišnji obračun za 2024. godine predat je nadležnoj Finansijskoj informatička agencija, Poslovna jedinica Zenica, Ispostava Zavidovići dana 09.04.2025. godine. Popis imovine na dan 31.12.2024. godine nije vršen. Društvo nije sačinilo bilans stanja i uspjeha za 2025. godinu, odnosno isti joj nije dostavljen. Prema godišnjem obračunu za 2024. godinu obaveze društva na dan 30.09.2025. godine iznose 74.539,76KM. Prema Bruto bilanci glavne knjige za 2025. godinu, od 30.09.2025. godine obaveze iz poslovanja iznose 8.331,85 KM, 61.022,11 KM odnosi se na obavezu po osnovu plaće i naknade i ostalih primanja zaposlenih, druge obaveze iznose 2.306,90 KM, obaveze po osnovu PDV-a 634,64 KM i obaveze za ostale poreze i doprinose i druge dadžbine u iznosu od 754,11 KM. Završni računi od prethodni godina su kod Starčević Sabahete koja je upravljala poslovanjem društva, kao i ostala dokumentacija ZISA-TEX d.o.o. Zavidovići. Direktor Hutinović Zikret se nalazi na radu u Sloveniji i sa njim je obavila razgovor putem telefona. Prema Bruto bilansu od 30.09.2025. godine privredno društvo ima zaliha i sredstava namijenjena prodaji u iznosu od 4.279,50KM, dok prema riječima direktora i Starčević Sabahete društvo ZISA-TEX d.o.o. Zavidovići nema nikakve imovine. Na adresi na kojoj je registrovano privredno društvo nalazi se drugo privredno društvo, te nema nikakve zaliha niti repromaterijala koji je služio u proizvodnji privrednog društva. Prema riječima Starčević Sabahete zalihe su se odnosile na tekstilni materijal, opremu koja je potrebna da bi se odvijao proces rada, te zbog samog sastava materijala isti više ne postoji, odnosno zbog proteka vremena je rekla da se čak i ne sjeća šta se desilo s tim. Potraživanja od prodaje, kupci u zemlji iznose 3.280,71 KM, te napominje da ZISA-TEX d.o.o. Zavidovići nije poslovao poslije 2021. godine i da su potraživanja zastarila. Prema Bruto bilansu glavne knjige godina 2025. u blagajnoj ima 1,38 KM, dok prema riječima direktora i Starčević Sabahete ZISA-TEX d.o.o. Zavidovići nema novčanih sredstava. ZISA-TEX d.o.o. Zavidovići ima otvoren glavni račun broj 1610000230360073, kod Raiffeisen bank d.d., koji je blokiran dana 27.07.2022. godine, kako to proizilazi iz Izvještaja o računima poslovnog subjekta od 03.10.2025. godine, sačinjen od Centralne banke Bosne i Hercegovine. Kod Odsjeka za administraciju Zavidovići, MUP Zenica ZISA-TEX d.o.o. Zavidovići u svom vlasništvu nema registrovanih vozila. Privredno društvo nema nekretnina u svom vlasništvu, prema podnesku suda Općinskog suda u Zavidovići broj: 042-0-RZ-25-000 407 od 02.10.2025.godine i nije upisan kao nosilac prava u katastarskom operatu, a prema Uvjeranju, broj: 06/6-30-2934/25-1 od 30.09.2025. godine izdatog od Grada Zavidovići, Služba za upravu, geodetskih, imovinsko-pravnog poslova i urbanizma. Prema Uvjeranju Porezne uprave Federacije BiH, Porezne ispostave Zavidovići, broj: 13-4/2-12-5-1711/25 M.K. od 03.10.2025. godine ZISA-TEX d.o.o. Zavidovići ima dospjele obaveze u iznosu od 17.906,83KM. Društvo nema zaposlenih radnika, nema poslovnih aktivnosti, jer prema riječima direktora ne obavlja registrovanu djelatnost od polovine 2021. godine i isto je neprofitabilano od 2021. godine, nelikvidnost predstavlja ključni problem za dužnika jer privredno društvo više ne posluje. Stečajni dužnik ne može nastaviti poslovanje u toku prethodnog postupka, jer nema poslovnih aktivnosti, što znači da nema prihoda. Zaključno mišljenje shodno članu 63. Zakona o stečaju Federacije BiH ("Službene novine Federacije BiH, broj 53/21 od 07.07.2021.godine) je da društvo nema imovinu. Postoji stečajni razlog za otvaranje stečajnog postupka iz razloga platežne nesposobnosti stečajnog dužnika i to u neprekidnom trajanju dužem od 60 dana. Prijedlog za otvaranje stečajnog postupka stečajnog dužnika koji je podnesen od ovlaštenog lica od strane direktora nije podnesen u roku od 60 dana od dana platežne nesposobnosti. U skladu sa navedenim mišljenja je da je prijedlog dopušten i osnovan, kao i da su se stekli zakonski razlozi za otvaranje stečajnog postupka nad pravnim licem ZISA-TEX d.o.o. Zavidovići, pa predlaže da Sud pozove povjerioce da predujme troškove u od 5.000,00 KM, te ukoliko povjerioci predujme troškove stečajnog postupka da sud otvori stečaj, a u protivnom da Sud otvori i zaključi stečaj nad navedenim pravnim licem i isto briše iz sudskog registra.

Dakle, Društvo za proizvodnju, trgovinu i usluge ZISA-TEX d.o.o. Zavidovići nema imovine koja bi mogla biti predmetom stečajne mase, obzirom da isto proizilazi iz gore navedenog Izvještaja privremenog stečajnog upravnika i dokaza dostavljenih uz izvještaj.

Zbog svega navedenog zaključak je da društvo ne posjeduje nikakvu imovinu, te da postoji stečajni razlog za pokretanje stečajnog postupka, ali da imovina društva nije dovoljna da pokrije troškove stečajnog postupka.

Imajući u vidu prethodno navedeno, sud je, primjenom odredbe člana 102. stav 7. Zakona o stečaju, Rješenjem od 09.04.2026. godine, objavljeno u „Sl. novinama FBiH“ br. 32/26 od 29.04.2026.godine, pozvao povjerioce i zainteresovana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka u iznosu od 5.000,00 KM, te da po izvršenoj uplati predujma sudu dostave uplatnicu, kao dokaz da je uplata izvršena. Visina troškova srazmjerno je određena visini troškova koji se očekuju, a koji su neophodno potrebni za otvaranje i vođenje stečajnog postupku.

Kako stečajni dužnik ima obaveze, a nema imovine pa ni za troškove stečajnog postupka, a zainteresirane osobe ni po proteku roka ostavljenom u rješenju donesenog od strane ovog suda nisu predujmila novčani iznos za pokrivanje troškova stečajnog postupka, to je primjenom odredbe čl. 102. stav 8. Zakona o stečaju, („Sl. Novine F BiH“ broj: 53/2021), odlučeno kao u izreci ovog rješenja.

Ovim rješenjem određeno je otvaranje i istovremeno zaključenje stečajnog postupka i brisanje ove pravne osobe iz sudskog registra.

POUKA O PRAVNOM LIJEKU

Protiv ovog rješenja može se izjaviti žalba u roku od 8 dana od dana dostavljanja, Kantonalnom sudu u Zenici putem ovog suda u tri primjerka.

Stečajni sudija

Amela Sinanović